

明張文忠公全集

明張文忠公全集一

奏疏六

聞憂謝降諭宣慰疏

本月二十五日得臣原籍家書知臣父張文明以九月十三日病故臣一聞訃音五內崩裂茲者伏蒙皇上親灑宸翰頒賜御劄朕今覽二輔所奏得知先生之父棄世十餘日了痛悼良久先生哀痛之心當不知何如里然天降先生非尋常者比親承先帝付託輔朕沖幼社稷奠安天下太平莫大之忠自古罕有先生父靈必是懽妥今宜以朕爲念勉抑哀情以成大孝朕幸甚天下幸甚欽此該司禮監太監李佑恭捧到臣私第臣不忠不孝禍延臣父乃蒙聖慈曲軫哀憐犬馬

餘生慰諭優渥臣哀毀昏迷不能措詞惟有痛哭泣血而已
臣不勝激切哀感之至

謝遣官賜賻疏

臣於本月二十五日聞臣父憂今日欽奉聖旨賜臣銀五百
兩絁絲十表裏新鈔一萬貫白米二十石香油二百斤各樣
碎香二十斤蠟燭一百對麻布五十疋該司禮監隨堂太監
魏朝恭捧到臣私第臣謹叩頭祇領訖伏念臣犬馬微生樗
蒲賤質事主不能效匡扶之力事親不得盡菽水之歡以致
抱恨終天雖生猶死仰荷聖慈曲垂憫念昨既奉慰諭之勲
惓茲又拜賜賚之隆渥顧此殊恩今昔罕覩臣一家父子歿

者銜環結草存者碎首捐軀猶不足以仰報聖恩於萬一也
臣哀苦愚衷昏迷罔措仰天泣血辭不能宣誠不勝激切感
戴之至萬歷五年九月二十七日

謝兩宮太后賜賻疏

臣於本月二十五日聞臣父憂今日欽奉仁聖皇太后懿旨
賜臣銀五百兩紵絲十表裏新鈔一萬貫白米二十石香油
二百斤各樣碎香二十斤蠟燭一百對麻布五十疋該慈慶
宮管事太監張仲舉恭捧到臣私第臣謹叩頭祇領訖伏念
臣罪惡深重禍延臣父以致抱恨終天痛苦幾絕仰荷慈恩
垂憐犬馬殘生諭慰諄切又特頒厚賻赫奕充庭顧此殊恩

古今罕遇臣一家父子歿者銜環結草存者捐軀殞首猶不足
以仰報慈恩於萬一也臣哀苦愚衷辭不能布誠不勝激
切仰戴之至

慈聖皇太后賜賻謝疏

同前

謝卹典疏

臣於本月二十八日該禮部題爲卹典事欽奉聖旨是朕元
輔功在社稷伊父卹恩委宜從厚著照例與祭葬仍加祭五
壇各差官前去祭葬以示優眷欽此伏念臣負罪積愆禍延
臣父仰荷聖慈特頒恩卹廕溫綸之俯賁視彝典而加優犬
馬何有微勞烏鳥獲伸私悃古今罕遇存歿均霑臣雖糜骨

捐軀莫能仰酬洪造於萬一也臣哀苦病憊未能匍匐闕庭
俯伏叩謝不勝激切仰感之至萬厯五年十月初二日

乞恩守制疏

臣於本月二十五日聞父訃音卽移咨吏部題請放臣回籍
守制隨該吏部題奉聖旨朕元輔受皇考付託輔朕幼冲安
定社稷朕深切倚賴豈可一日離朕父制當守君父尤重准
過七七不隨朝你部裏卽往諭著不必具辭欽此臣在憂苦
之中一聞命下驚惶無措臣聞受非常之恩者宜有非常之
報夫非常者非常理之所能拘也臣一介草茅忝司政本十
有餘年受先皇顧託之重荷聖主倚毗之專無論平日所承

隆恩異數超軼古今卽頃者聞憂之日兩宮聖母爲臣憫惻
聖心感動爲臣悽惋慰弔之使絡繹道途賻贈之資充溢筐
篚又蒙皇上親灑宸翰特降璽書中間慰藉之勲篤勉喻之
諄切尙有溢於聖言之外者臣伏而讀之一字一淚雖旁觀
逖聽之人亦無不傷心酸鼻者夫自古人臣以忠結主商則
成湯之於伊尹高宗之於傅說周則成王之於公旦漢則昭
烈之於諸葛亮其隆禮渥眷辭命誥諭之文載在史冊至今
可考固未有謙抑下巽親信敬禮如皇上之於臣若是之懇
篤者此所謂非常之恩也臣於此時舉其草芥賤軀摩頂放
踵粉爲微塵猶不足以仰答於萬一又何暇顧旁人之非議

徇匹夫之小節而拘拘於常理之內乎且人之大倫各有所重使幸而不相值則固可各伸其重而盡其所當爲不幸而相值難以並盡則宜權其尤重者而行之今臣處君臣父子兩倫相值而不容並盡之時正宜稱量而審處之者也況奉聖諭謂父制當守君父尤重臣又豈敢不思以仰體而酌其輕重乎願臣思之臣今犬馬之齒纔五十有三古人五十始服官政而本朝服制止於二十七箇月計臣制滿之日亦五十六歲耳此時自量精神體力尙在強健皇上如不以臣爲不肖外則操戈執銳宣力於疆場內則荷橐持籌預議於帷幄遠邇聞劇惟皇上之所使雖赴湯火死不敢避是臣以二

十七月報臣父以終身事皇上昔人所謂報國之日長報劉
之日短者也如此則君臣父子之倫雖不得以並盡而亦不
至於相妨夫古人有銜哀赴官墨綬從政者有金革之事則
可方今賴皇上威德四郊無壘九塞清塵故臣欲以其間少
盡私情此臣之所以籲天泣血哀鳴而不能自己者也伏望
聖慈垂念烏鳥微情曲賜允許不惟臣之愚衷獲安臣父有
知亦銜感於九泉矣萬曆五年十月初二日奉聖旨卿篤孝
至情朕非不感動但念朕昔當十齡皇考見背丁甯以朕囑
卿卿盡心輔導迄今海內乂安蠻貊率服朕冲年垂拱仰成
頃刻離卿不得安能遠待三年且卿身繫社稷安危又豈金

革之事可比其強抑哀情勉遵前旨以副我皇考委託之重
勿得固辭吏部知道欽此

再乞守制疏

頃者以臣父病故奏乞回籍守制伏奉聖旨卿篤孝至情朕
非不感動但念朕昔當十齡皇考見背丁甯以朕囑卿卿盡
心輔導迄今海內乂安蠻貊率服朕冲年垂拱仰成頃刻離
卿不得安能遠待三年且卿身繫社稷安危又豈金革之事
可比其強抑哀情勉遵前旨以副我皇考委託之重勿得固
辭吏部知道欽此臣在痛楚困憊之中捧誦綸音至先帝顧
託一節觸地號天肝腸寸裂夫人之相與然諾相許猶能捐

軀赴義死且弗背臣於國家糞土草芥之臣耳先帝不知臣不肖臨終託臣以大事丁甯付囑言猶在耳中道而背之雖施於交友然且不可乃敢以此事吾君父而自蹈於誅夷之罪乎蓋臣今所乞於皇上者非長往遠引背而去之之謂也痛念臣父別來十有九年雖陟岵之懷時時在念而以國家事重未敢言私竊常自擬俟皇上下大婚禮成暫乞一假歸省不圖一旦奄至於此使臣抱恨終天今日雖得歸家亦知攀號無及但念臣父生身恩重今縱不得再覩其音容然及其未殯憑棺一慟身負簣土加於邱壠之上猶得少追其違曠之咎以慰冥漠之魂比及禫除臣當不俟宣召馳赴闕庭以

聽任使是臣未盡愚忠尙有俟於他日也若此願不獲將負
痛終身雖勉強在此而精神沮喪心志昏迷發慮出謀必至
乖舛或因而鬱鬱致病喪此殘軀則忠孝君親兩俱有損此
臣所以展轉恟惶而不能已於哀鳴也夫君臣之義無所逃
於天地之間君之於臣欲其生則生欲其死則死命之進則
進命之退則退臣豈敢以區區螻蟻微情仰干大義之重所
以屢控而不止者亦恃皇上平日諒臣之深眷臣之篤憑寵
怙恩而覬幸於一獲耳臣連日痼切窮苦心蘊結而難紓語
荒迷而無次惟聖慈哀憐臣下情不勝瀝血抆淚懇切祈望
之至萬曆五年十月初五日奉聖旨覽奏詞益哀懇朕惻然

不甯但卿言終是常理今朕冲年國家事重豈常時可同連
日不得面卿朕心如有所失七七之期猶以爲遠矧曰三年
卿平日所言朕無一不從今日此事卻望卿從朕毋得再有
所陳吏部知道欽此

謝賜甜食疏

伏蒙聖母皇上特遣近侍官孫良尙銘到臣私第頒賜甜食
二盒茶食二盒又傳奉慈諭著臣節哀自愛臣謹叩首祇領
不勝感戴天恩之至萬厯五年十月初四日

三乞守制疏

比者臣再疏陳乞伏奉聖旨覽奏詞益哀懇朕惻然不甯但

卿言終是常理今朕沖年國家事重豈常時可同連日不得面卿朕心如有所失七七之期猶以爲遠矧曰三年卿平日所言朕無一不從今日此事卻望卿從朕毋得再有所陳吏部知道欽此又聞同官二臣言昨送本官將臣奏本到閣傳奉聖意云雖上百本亦不能從嗟乎古語云犬馬之誠不能動人譬人之誠亦不能動天臣始不信今乃見之臣前後所奏哀苦迫切之情非不仰觸聖心也悲鳴號泣之聲非不上徹天聽也然竟不能徼一二之幸於萬分之中者仰窺皇上之心不過以數年以來舉天下之重盡屬於臣見臣鞠躬盡瘁頗稱意指將謂國家之事有非臣不能辦者此殆不然也

夫人之才識不甚相遠顧上用之何如臣之不肖豈真有卓
犖超世之才奔軼絕塵之力惟皇上幸而用之故臣得盡其
愚耳今在廷之臣自輔臣以至於百執事孰非臣所引薦者
觀其器能咸極一時之選若皇上以用臣之道而用諸臣諸
臣以臣心之忠而事皇上將臣平日所稱聖賢道理祖宗法
度此兩言者兢兢守之持而勿失則固可以端委廟堂而天
下咸理是臣雖去猶未去也何必專任一人而使天下賢者
不得以各效其能乎且臣尚有老母年亦七十二歲素嬰多
病昨有家人到致臣母意囑臣早歸田野之人不知朝廷禮
法將謂臣父旣沒理必奔喪屈指終朝倚閭而望今若知臣

求歸未得相見無期鬱鬱懷思因而致病則臣之心益有不能自安者矣皇上方以孝養兩宮何不推此心以及臣之母乎夫人之最難遣者憂思之情也臣本孱弱之軀數日之間上戀君恩下念父母欲畱旣不可欲去則未能抱此沈思寢食俱廢若使憂能傷人則臣之身亦有不能自保者矣皇上誠欲用臣何不生全之以責他日之效乎臣聞獸死不擇音今臣情勢窘急無可奈何跼地號天誠不自知其詞之過激而有干於嚴譴也惟聖慈哀其愚而矜許之臣無任拭淚拭血懇切仰干之至奉聖旨朕爲天下畱卿豈不軫卿迫切至情忍相違拒但今日卿實不可離朕左右著司禮監差隨堂

官一員同卿子編修嗣修馳驛前去營葬卿父完日卽迎卿
母來京侍養用全孝思卿宜仰體朕委曲眷畱至意其勿再
辭該衙門知道欽此

謝降諭慰畱疏

臣二疏陳情未蒙俞允今日該司禮監太監何進恭捧御筆
諭元輔朕以冲幼賴先生爲師朝夕納誨以匡不逮今再三
陳乞守制於常理固盡於先帝付託大義豈不鮮終況朕學
尙未成志尙未定一日二日萬幾尙未諳理若先生一旦遠
去則數年啟沃之功盡棄之矣先生何忍已有旨特差司禮
監官同先生子前去造葬事完便就迎接先生老母來京侍